

四庫全書

集部

欽定四庫全書

石倉歷代詩選卷三百三十一

明 曹學佺 編

明詩初集五十一

虞謙字伯益
金壇人

擬古

黃鳥鳴高樹載欣朝日明窗下弄機女窈窕含閨情輕
杼軋長絲飛梭不同聲千絲寸不就萬絲尺不成黃鳥

辭我飛別墅。嚶嚶鳴爾鳴。從別去。秉梭終有程。坐待簾櫳晚。無言新月生。

其二

芙蕖開綠水。燦若雲錦裳。薰風日披拂。吹面散清香。風回翠蓋翻。下有雙鴛鴦。鴛鴦自棲宿。荷花亦相忘。忽逢溪邊女。蕩槳歌悠揚。坐待霜露繁。翠羽亦高翔。空遺采蓮曲。何由斷人腸。

題水竹居

若人抱貞素種竹溪水曲水清竹亦清於焉結茆屋蕭
然寡塵事讀書志彌篤窗虛涵碧陰夜靜響飛瀑鳳羽
激涼颺魚波樣新涼渴飲澗中泉飢斲林下玉我亦斯
人儔開圖快心目願言一相過秋風駕黃鵠

為鎮上人題明秀軒

大江從西來遙遙幾千里誰知巨鼈簪兀向中流起其
陰曰瓜洲風氣甚清美舟車競來往百物紛聚蟻中有
古道場勝地平若砥崇堂闊宏奧幽徑隔塵市上人夙

好道閉戶動一紀貞姿類松柏安肯炫桃李賓筵苦湫
隘新構俯江涘出門見青山流水度階址南薰日披拂
襟懷淨如洗問訊請厥名對景足堪擬大書揭楣間庶
用鑑行止我來總輸運寓宿東齋裏豈惟事游衍正要
勤政理行當觀天闕戀戀情曷已勉馬弘所圖肇迹自
今始

夜宿元陽觀張大亨方臺

曉望三茆峰暮達元陽觀出門未百里頓覺風景換絀

路厭蒙密逕泉復凌亂幽鳥隔林啼驚麁入竹竄攀危
髮生寒歷險脇沾汗峩峩大峰頂夐與塵壤判石潭走
蜿蜒松顛巢鶴鶴白雲天際來飛揚何浩瀚攬之不能
得凭欄恣怡翫方臺極高興靈軒蔽幃幔峰峭類簪筆
嶺夷若橫案牀頭鍊丹處神光燭遙漢緬昔有高士疎
髯映修幹夙事玉海仙架屋岩之半度世脫紛擾解蛇
遊汙漫石室樹貞碑文彩尚昭煥矧茲張鍊師繼事更
孤岸高懷契玄理沖襟絕羈絆宴誦三洞章焚香手頻

盥朝尋赤松子暮謁洪崖伴植行益修潔聲稱動州閑
予亦慕真侶動止寡籌箕偶爾從之遊中心樂且衍維
時秋氣佳晴旭照車幔登覽縱杯酒塵慮豁分散未知
步虛吟聊為揮詞翰

送友之武昌僉憲分題得鸚鵡洲

黃鶴樓前鸚鵡洲鸚鵡昔年來此遊如今鸚鵡在何處
聞道西飛隴山去西飛一去竟不還空有寒流向東注
芳草春迷南浦雲夕陽晚帶西江樹送君此去登憲臺

武昌一道煙塵開還過洲上賦鸚鵡寄與樓頭黃鶴來

長淮泛舟

畫船曉泛南洲渚獨客高眠悄無語西風吹起綠塘雲
卷落蓬窗半江雨雨聲瀟瀟蘆葉鳴船頭放歌沙鳥驚
隔溪遙見南山青順流直到垂楊汀須臾雲散雨亦歇
波光上接天冥冥呼童烹鱗酌新酒臥聽洞簫吹月明

舟中

春江雪消春水漲畫船蕩漾來天上荷花照人楊柳青

船頭放歌雙櫓鳴歌聲漸高櫓聲小水波不興風力少
歸雲斜度夕陽邊青山半落滄江表買魚沽酒待月明
題詩遠憶眉山叟夜來白鶴忽飛來須臾夢覺東方曉

聽朱太常少卿彈琴

高堂夜靜華月明博山火暖春雲生高人膝上三尺琴
興來一彈神鬼驚上絃長清短清之古曲下絃前山後
山之飛瀑恍疑天風吹下仙壇之鳴鸞又疑神斧鑿碎
荆山之良玉使人聽之情思深坐中頓覺消塵襟百年

慨仰鍾子心一洗萬古淫哇音

題湘江竹林圖

秋風嫋嫋湘江曲秋水瀟瀟湘水綠湘江之人美如玉
翠袖天寒倚修竹鷓鴣時來林外啼鳳凰夜向枝頭宿
我欲因之泛長江歷蒼梧兮覽瀟湘天高海闊白日靜
九疑山色雲茫茫雲茫茫增煩吁忽憶山中二三月茹
有紫筍食有魚開軒賦就淇園句都向琅玕節上書

春曉曲

轆轤伊軋綺窗曉翠幃夢覺芳春好暖雲含雨浮碧空
香霧和煙濕瑤草東風吹柳搖黃金鶯啼燕語愁人心
愁人心向誰人說天涯遊子歸未歸閉門落盡梨花雪

畫竹自題

我昔汎東溟拾得蒼龍尾置之懷袖中夜夜涼風起化
為金錯刀欲剪瀟湘水只恐春雷鳴飛上青雲裏

題東臯野人

崇巒薄層霄嘉樹翳平陸窗前流水聲簷下白雲宿晨

興眺東阜時還展書讀澹然無俗營素心良自足

新春偶書

晨興涉芳園晴旭照東林佳樹藹新綠花間有鳴禽臨
風散塵想俯溪澄道心歸來念知己因之發長吟

又

端居感時駛往苒冬復春修篁沐初雨古木含蒼雲物
類既榮暢吾情亦欣欣緬然保貞素永答覆載恩

遊東園

閒居澹無事琴書樂餘清倦從南軒臥時向東園行疎
篁含雨意古木敷春榮撫景恣遊眺長吟發高情

青龍山道中

晚過青龍下西風瘦馬催水從平地出山向半空來月
冷林棲鳥霜晴谷放梅百年遊宦客重上鳳凰臺

秋曉

不寐晨興早秋堂燕坐清曙光欺月色露氣逼蛩聲新
穀炊方熟寒葵落又生牀頭故書在終日未忘情

過友人山居

遠訪幽人宅脩脩水竹蒼石田沿隴瘦野井傍山涼買酒招鄰曲題詩寄草堂向來一禪子今見過余長

曉出太平門

曉出太平門東鄰日漸暾天光開晃朗曙色散清溫碧漢流無極青山勢獨尊岡頭古松樹雨露每承恩

二月五日與張公迪共飲分韻

良宵有佳會況在爾東家已覺傷春雨先須問杏花青

山隨處好綠竹向人斜共愛張郎俊才能比孟嘉

過湖州苕溪驛

吳興山水窟公館一塵無地勢來天目溪流入太湖贊
成供歲用菱熟當秋租樓閣煙雲外猶堪入畫圖

東軒偶書

東軒日無事俗客少相干柳外禽聲早花間雨氣寒丹
心恒自許青眼更誰看獨愛雲霄鶴乘風奮羽翰

寄南舟洽公

為愛長干寺西林景最妍石燈明似月竹室小如船地
僻渾忘世心清久悟禪有時佳客至相與伴雲眠

遊宜興大涪山追和鄉先生史良臣詩韻

夏日湖心寺危欄面面通一山都見水萬竹盡含風石
竈茶煙碧螺杯酒暈紅勝遊懷舊集歸棹夕陽中

閒居

蜜熟黃蜂靜泥融紫燕忙日停花妥艷風過竹生香美
景追遊少中年感慨長一樽消晚坐乘月更移牀

過道士王一初丹室

築室依仙境幽居迥不同竹間惟養鶴石上祇裁松碧海三山近瑤臺萬里通鼎中丹若就莫遣白雲封

台州

千里東南路孤城傍海壘湖通溪上水山壓樹頭煙地僻無征旅民稠悉種田喜聞軍令肅邊寇息多年

飛雲渡

曉過東關渡飛雲接渡頭衣冠迎遠道歌吹起中流巨

港通番舶危峰壓戍樓海鄉民物庶文雅出東甌

田家晚泊

風磴翻危葉霜槐出斷根過橋逢野老倚杖候柴門馴犬熟迎客歸鴟遠認村茆簷投晚泊煙霧斂初昏

龍泉道中

峰峻碧雲連松間屋數椽引泉新作磧疊石舊為田林
暝花飄雨溪晴竹帶煙驅馳驚歲晚何日遂朝天

送人省親

都城三月柳如煙送客東歸思惘然太學三年紅杏雨
故鄉千里白雲天曉經北固花迎旆夜泊西湖月滿船
記取明年春雁過新詩還寄錦雲箋

寄懷柘溪書館

家住三茆碧澗東懷人清思月明中白花滿地翻松雪
翠羽鳴窗和竹風長晝不知書夢遠好春休放酒杯空
閒居詩句人爭寫費盡鸞牋與筆工

遊雞鳴寺

雞鳴山頂梵王家竹樹蕭疎石磴斜月照臺前僧施食
日高亭上客烹茶迢迢幽徑通靈界密密深闊隔世譁
獨倚闌干望鄉邑浮雲如葢異天涯

題戒上人泊雲軒

萬松深處一茆亭雲氣蕭蕭岩壑清小榻夢回晴絮暖
上方身被白衣輕雷鳴春谷知龍化雨過秋林辯鶴聲
杖錫又從京刹住燈傳應得祖師名

遊顧龍山為榮上人題清輝樓

峩峩飛閣倚岩阿極目溪山樂趣多簾捲白雲生遠岫
窗含明月印澄波丹霞有客題詩去畫舫何人載酒過
幾度登臨歸路晚數聲鴉鳥出煙蘿

題綠筠軒

爾家住在簫簧谷曾聽西窗夜雨聲彩鳳歸來山月上
蒼蚪飛動海風生四時翠色連書幌六月涼陰護酒觥
我亦有軒修竹裏相期同結歲寒盟

遊顧龍山

山橫煙靄樹蒼蒼中有神人古道場寶塔遠連星斗出
畫樓高拂鳳鸞翔林間煮酒青梅熟雨後烹茶紫筍香
忽憶舊遊三十載夢魂飛繞白雲鄉

送山陰王內敬之遼東

送客東行買畫船故林三月正啼鵑紅螺香泛梨花雨
白苧晴分楊柳煙千里征途遼海上五更歸夢越江邊
遙知別後相思處夜半詩成月在天

長淮舟中

長淮西上水漫漫四顧渾如碧海寬
白酒盈樽聊獨酌青山滿眼共誰看
芙蓉半落秋風老鴻雁初來暮雨寒
千里思親歸夢遠昨宵隨月到長安

登壽州城樓

繫馬重登溪上樓白雲紅葉照清秋
黃河東下歸淮海翠嶺南來繞蔡州
對月豈辭今夜醉看花還憶少年遊
朝天只待春正月畫舫東風過石頭

濠梁驛與盧侍郎別

淮水西來千里長波濤洶湧日昏黃當門綠柳是何處
隔岸青山非故鄉漁歌乍歇棹歌起藕花半落蘋花香
明日濠梁與君別相思兩地雲茫茫

清真軒為王駙馬題

禁城西畔列侯家別有軒居靜不譁遼檻竹聲鳴翠雨
隔簾雲氣逐飛花錦箏按曲春行酒寶鼎燒香夜煮茶
最愛屋頭山色好雨餘蒼翠濕窗紗

遊金山

闖山迢遞接神州纔到南徐却暫留月帶鐘聲來枕上
雲移山影過船頭煮茶夜汲中冷水攜酒朝登北固樓
竊祿自慚無以報此心朝夕向東流

湖州

城臨震澤水如空天目南來地勢雄滿院新涼桐葉雨
一簾清氣藕花風民生自足耕桑內士俗猶存禮義中
追想玉堂人去遠圖書零落水晶宮

過姑蘇

畫舫琴書載碧流順風三日到蘇州帆移楊柳堤邊路
人在芙蓉水上樓古阜龍蹲秋月照荒臺鹿走暮雲收
香醪滿泛鱸魚美臥聽吳兒夜唱籌

遊虎丘山

闔閭城外虎丘山古塔凌嶒紫翠間暫向溪邊停畫舫
謾來林下扣禪關水流長見花開落僧定不知雲往還
最愛西岩如畫裏可能無意一凭欄

靈巖寺

來訪東吳第一峰石林高聳梵王宮靈巖雨過千山碧
香徑花飄十里紅路轉長廊空響屢客來深院喜聞鐘
攜琴更為凌高頂回首姑蘇夕照中

西湖

西湖開鑿大唐年夾岸樓臺夕照邊一鏡天開浮碧玉
兩峰雲淨出青蓮雪中杖屨尋梅客月下笙歌載酒船
我欲乘風遊汗漫不知何處問坡仙

寄武林諸老

鳳有高臺鶴有樓懷人千里夢悠悠夜深酒泛梅窗月
晝靜琴鳴竹院秋海內文章新製作江南人物舊風流
題詩寄謝諸夫子望斷碧雲天際頭

過錢塘江

白鳥雙飛下綠蕪東風吹雨客帆孤江聲暗逐潮來往
雲氣半隨山有無忽見沙頭來翡翠還聞海底出珊瑚
中流穩坐推蓬看絕勝高臺展畫圖

送嘉禾徐照磨復任

為愛名駒產渥洼青雲材質向人誇簿書又見參名郡
詩禮從知出故家酒向樽前傾竹葉春來江上折梅花
東風未忍匆匆別回首征鴻帶落霞

遊白龍湖和韻

人間六月憎炎暑我愛龍湖此日涼停扇按歌桃葉小
舉杯聯話藕絲長醉翁慷慨矜風裁詞客疎狂賞雪香
歸路浮雲忽相放持蓬急雨正淋浪

為張都司題蘭軒

華軒蕭爽近岩巒種得幽花滿石壇九畹香風春未老
一簾晴雪夜生寒彈成古調同誰和賦就新詩每自看
更似山陰修禊處紫雲長繞碧琅玕

三峰

小峰天外聳青螺樹杪飛宮入薜蘿千日酒中風味美
三層樓上月明多丹崖落葉如飄雨翠崦浮雲若湧波
最愛道人清似鵠夜涼吹笛看銀河

天台

赤城自古號名山萬丈華峰更可攀龍送雨來歸洞口水流花落到人間天風聲度瓊臺鶴夜月光生玉井丹欲訪桃源無覓處一琴空向石梁還

步月歌

大風吹雲碧空淨仙娥捧出瑤臺鏡玉氣寒凝海宇清
金波冷徹天街瑩興來酒斟白玉童浩歌一曲聲摩空
身披紫霞氅手把青芙蓉飄然直上蓬萊宮

清溪書舍為丹陽洪仲章賦

練湖南來溪水清溪上草堂新構成波光漲雨簾幙潤
樹影拂雲窗戶明東臯種秫可為酒西塞買魚堪作羹
百年詩禮今猶在願爾力學傳家聲

過高郵湖

雨餘湖上晚涼收紅藕花開白露秋明月在天清似水
吹簫憶向洞庭遊

客中元夕

去年此夕宴傳柑兩袖天香酒半酣今夜客窗風又雨

可無歸夢到江南

丹霞真館

華陽山裏遊三日清氣逼人渾欲仙偶到丹霞亭子上

抱琴和月瀉松泉

會稽道中

茂林修竹映飛湍十里青山馬上看正是一年寒食候
落花吹雨不勝寒

仙居道中

一重山外一重田
十里松風十里泉
最愛小樓微雨過
有人清晝讀書眠

溫州

翩翩征旆向南行
海上青山照眼明
昨夜芙蓉溪上雨
西風吹入棹歌聲

重陽

奉使南巡碧海頭
眼驚時序急如流
無端風雨重陽節
韞負黃花又一秋

石倉歷代詩選卷三百三十一

欽定四庫全書

石倉歷代詩選卷三百三十二

明 曹學佺 編

明詩初集五十二

胡翰

字仲申
金華人

之子于征美監胄陳生也陳生歸省其母奉養
于京師故助其行以慰其母心焉

之子于征有楚者衣翼彼北風翩其以歸豈忘在公爰

恤爾私惟皇有命來慰母恩之子于征言汎其艤明發
于越夕濟西吳薄登于畿安車載驅惟皇有命將母來
居之子有母令儀有必養則有祿皇斯爾錫曷以報之
顧懷罔極竭爾臣節迺殫子職

新城頌頌

新城頌頌孰究安宅帝綏東人命我邦伯邦伯莅止作
之司轄慎迺夙夜奮其桓撥弓矢斯抗戈銃孔鑠寇來
授首開門可研新城臘臘疇敢余侮邦伯惟翰遵養其

旅野無舉燧田有棲稌偃旗臥鼓不試亦武如彼雷行
濡以甘雨民斯樂胥帝靡東顧自東徂西自南徂北芒
芒禹迹肇我邦域我民綏矣我公歸矣令聞令望執德
不回受祿不肯公則有之民何貺之薄言酬之惟天子
是毗下民是宜

鬱鬱孤生桐

鬱鬱孤生桐託根鄒嶧顛皎皎白素絲出自岱畎間一
朝奉庭貢妙合良自然桐以為君琴絲以為君絃中含

希世音置君離別筵征馬慘不嘶僕夫跪當前君行千里道豈惜一再彈南風日渺渺清商動山川和者昔已寡聽者今亦難

人生苦逼側

人生苦逼側莫處蠻觸間殺機起不測朝夕相構患尺書下齊城丸土封秦闕用意何崎嶇舉世當其賢湯泉自長溫蕭丘自長寒天地有至性貧賤吾所安

維南有佳鞠

維南有佳鞠風露發清妍離離絲玉樹粲粲黃金錢色
含坤裳美質抱日精圓蘊靈自女几滋布瀾樊川既入
神后品還充仙子殮中壽登百歲上壽延千年千年與
百歲何異瞬息間獨有幽貞節可比金石堅託以奉君
子歲晏期弗谖

擬古

一夕復一夕一朝非一朝昨見春花開忽睹秋葉飄人
非金石姿安得長不凋窮年事輶翰駕言遠遊遨手提

具櫛劍拂拭鶻鵠膏含精變光彩上薄青雲霄願君勿棄置佩此長在腰南山有猛虎西江有長蛟研蛟取猛虎始貴非鉅刀

其二

白馬誰家子翩翩少年寶帶千金裘鞍垂兩橐鞬五侯爭馳鞚七族莫比肩來往長楊間捷出飛鳥先朝從羽林獵夜展秦樓筵前檻列庭實中庖具珍鮮趙女舞雙袖吳姬調七絃張急調高起酒盡意彌堅恨無美人

贈中激壯士肝睽離各自愛重來還復然

其三

節節復促促雄鳴雌自續借問此何音有鳥人不畜三
文被身體五采爛盈目聲諧九成奏靈出衆羽族自從
阿閣傾再改岐山卜千年不來儀四野多暇贊世德誠
已微天路清且穆願因東南風吹度玉笙曲

其四

長安萬里堠日日送遠行輕車列千駟驃騎懸雙旌西

出橫門道意氣傾公卿
鉞戟夾左右部曲聯若星疾驅
呼延塞深入休屠城旄頭無時落邊風
旦暮驚刻功燕然石受爵天子廷

其五

梧桐生朝陽不附衆木林上枝拂雲漢下根固重陰歲
久林質古斲為姚氏琴朱絃組橫理加以玉與金徽軫
何粲粲清談揚妙音重華不可見懷思意何深

其六

千里不唾井與君相別難風塵雖異路恒願同悲歡在
金莫為玦在玉當為環聯以翠織成宛轉衣帶間相望
燕與越寸心良自堅日入已三商憂來翻百端遙遙託
清夢不知寒夜闌

其七

日長自愛惜夜長復悽惻人生幾何時少壯已非昔涼
風動萬里起念南與北山川路杳杳車馬去不息燕趙
高聲名荆揚壯材力仲尼七十說未遇身削跡為雲不

上天焉能雨八極

其八

昔聞崑山禾結實大如黍一食能療飢再飧可輕舉大
和溢肌髮含真逐仙侶左盼東華君右招西王母蒼籟
手共開金冊笑相旅后皇降嘉種寧遣同宿莽果果晨
出日祁祁載陰雨煦被非一朝長此千萬古

其九

飲酒須飲醇結交須結真貌合不足貴言合寧可珍長

安桃李樹家家自陽春常時握手者孰是同心人吳中
有雙劍一奉洛陽賓精靈颯然合萬里情相親

東望赤城山送人

東望赤城山遠在滄海頭雨雪方霏霏行人不可留衣
裳好結束文采珊瑚鈎早傳一禮書為報東諸侯書報
東諸侯藿食懷遠憂鄭虔所臨郡山多少田疇居民煮
海水海盡民始瘳丹丘有羽人歲晏長悠悠

游仙詩

夙志慕仙術笑傲人間春朝陪瑤池燕暮揚滄海塵道
逢安期生遨遊乘采雲粲然啓玉齒遺我紫金文天地
此中畢世大不得聞受之今十年留待逍遙君青鳥從
西來飛去扶桑津寄書久不到白首悲秦人

寄陳子尚錄事

東甌有一士周遊吳楚間一歲一歸養四十來作官人
生貴得意寄書忽長歎芳蘭委蔓草霜露復摧殘寸心
欲焉託相望隔山川出門道路修起伏千萬端直性不

得遂此道自古然寄書當路者下流良獨難

至正壬辰之春余臥病始起遭時多故奔走山
谷間觸物興懷忽復成什合而命之曰雜興
早歲苦憂患况茲抱沈疴展轉不能寐夙夜如枕戈骨
肉交相持朋友亦屢過感時寒燠易無乃久愆和石間
有三秀崑丘多玉禾達人貴知命永言心匪他

其二

病起不飲酒客來意何如四座皆春風燕燕深相於富

有富貴交賤有貧賤趨古意吾所愛今人寧見迂忘情
衡門下言笑色專腴忽淹嵇康駕何煩翟公書水煩魚
不大馭促馬已疲法令貴寬厚牛毛安所施秦風蕩六
合賦役懸高卑料民事隱覈簿書日孜孜君卿嘗見嗟
諒者以為宜共執如張弓後來誰弛之詩人詠豈弟勞
人千載思

其三

緣山列城郭歲久亦已頽羽檄來何方工作殷如雷六

丁運巨石泉扉蕩然開不知誰家墳暴露骨與骸古碑
置城頭歎息三徘徊死者何所知但為生者哀巴陵韓
希孟淑質自天挺一為軍中虜視死猶一暝寢云珊瑚
器不肯作溺皿借此清江水奠我全首領願魂化精衛
填海起成嶺皇天如有知許我血面請書帛字不滅千
歲光炯炯躡躅戎馬間丈夫可以警

其四

野王有二老矯若雙鳳雛不棲惡木枝寧啄中田稃翶

翔千仞上覽德周八區赤符啟帝子鏘其應瑤圖一鳴
洞蕪纊再舉凌天衢飄颻不可繫漢網亦已疎至哉高
尚風念此其誰歟恐非嚴光倫意乃董公徒

其五

偶家長山下遂與世途遠泉聲挂屋角曉見池水滿日
出生清華風來送餘善大化無端倪寧謂心有眼牀頭
遺古書歲月忽已晚玩之不能了聖哲有憂患

臥龍岡觀賈秋壑故第

宋祚移東南會稽國內地白日照城郭相君開甲第蜿
蜒臥龍岡高出列雉背審曲立萬檻增雄踰九陛飛拱
凌丹霞交疏激清吹上極高明居下有幽深隧栖甲戒
不虞為計亦已至以此忠社稷寧復憂隕墜揚揚昧所
圖擾擾復多制崦嵫日西薄祝栗風南厲魯港十萬師
聞鉦一聲潰木披本先蠹堤壞川如沛詩人謹厲階人
禍豈天意至今王夷甫百罰有餘戾摩挲岡頭石零落
重金字山川一何悠蒼莽鴻飛外舊時賀老湖酒船總

堪繫吾寧慕賢達聊以抒長慨

呂梁洪

河水趨山東四曠無險塞呂梁扼其衝凜若萬強敵水勢與石鬪終古怒未息舟行艤齶間衆挽不餘力進始踰跬步退忽落千尺長年起相語茲土神所職登祠奉嘉薦拜跪陳下臆船頭勇牽纜檣表高挂席好風東南來送我天北極叱馭誠足欽垂堂詎遑恤昔聞莊叟言有山在離石懸水三十仞魚鼈皆辟易孰慮天地性遂

拯生民溺鴻飛九州野吾願觀禹迹

夜過梁山灤

日落梁山西遙望壽張邑汎河帶灤水百里無原隰葭
菼參差交舟楫窮窪入劃若厚土裂中含元氣濕浩蕩
無端倪飄風向帆集野濶天正昏過客如鳥急往時冠
帶地孰踵崔蒲習肆噬劇跳梁潛謀固坏蟄古云萃淵
藪豈不增快悒悒蛙鳴夜未休農事春告及渺焉江上懷
起向月中立

益清堂為國子生張伯高賦

高堂思何浩宛若臨瑤池碧水皆種蓮垢氣安得縗玉質皎自內朱華爛相輝不矜顏色麗豈憂零落滋馨香無時發窈窕隨風吹堂中有美人佩服芳菲非與言誰與晤慨慕此良時寧無百年賞願結千載期流芳在人世樹德諒如斯

書黃賀州平蠻事後

荆楚綿百越襟帶極遐裔連山限車轍外薄海無際風

氣何紛厖羣蠢動相噬古雖郡縣置畫地出租稅負險
恒自固犬牙植形勢聚若蜂蟻來散如鳥鼠逝堯仁不
能復往往思一薙懸兵萬里外暴露蒙瘴癘亦有內齊
民詐誤混狂獮巢穴牢弗破根本先自殲天遺孽瓠種
出入民受害聖哲戒不虞窮討諒非計皇靈冒下土赫
赫火俱厲日月所出入有生盡懷徠賓賀崎嶇間苞苴
久聯締遣吏得黃侯為國開信誓王師不血刃緩頰下
椎髻列功奏天子璽書遠頒賚以大銀盃副之金帛

對嶺海數十城安得百其喙我聞范史言此屬非難制
力弱校弄薄非可羌戎例漢廷慎擇守祝良復誰繼侯
今鬚盡白侯心甚豈弟分符浙水上應念東人勸蠻猺
尚有知東人敢忘惠作詩勸不隕庶以示來世

西村老人隱居

振轡起陳力投簪遂辭祿吾今見伊人逍遙在郊牧令
節春載陽芳辰日初旭鳥鳴高樹顛牛飲澗溪曲翳翳
桑柘陰藹藹禾牟熟耰籽返故畬經過候新躅高榻生

風涼練衣無暑溽披帙欣自悟臨觴復誰屬情真不肅
客意豁已忘俗列生談力命老氏貴止足

夜宿寶石精舍

出郭隨驛子薄暮投山扉葉落故園樹危柯風更悲勞
生各已息不知夜何其上人池閣中燈火深相依盈樽
豈無酒多病久不持啖我園中菜飽我以豆糜出戶見
明月踏月褰裳衣悠悠故意長落落新知稀冉冉歲云
暮百爾慎所歸

京口紀行

大江風西來波濤一何浩我舟不得發徘徊越昏曉衡
運已朔易曜靈忽東果早出南徐州草乾霜露少慘慘
沙塵飛軋軋車輪繞寒氣來薄人重裘僅如縞日高衆
鳥翔天末孤帆杳川流與岡勢合沓自回抱人生大塊
間孰能出其表勉為辛苦行益見顏色槁人言野多虎
前驅善相保顧非千金軀祇欲仗穹昊共子陳此情歸
來臥蓬島

南京遇蘇平仲編修

南州苦寒月雨雪久不霁風沙滿長道四顧心飛揚君
子有行役束書歸故鄉故鄉浙水上遠在天一方父母
及兄弟昔別今五霜我昨來自東音問不得將為言起
居好良足慰予腸巍巍帝王都濟濟人物場噦噦爭先
鳴翩翩迺高翔六館走相送如惜孤鳳皇惜茲歲華晚
眷彼川路長臥聽吳門鐘歸共越人航上堂拜家慶兄
弟同樂康歡言酌春酒拜舞迎春陽願言千丈暉長照

百年觴

歸故山

西阜高見日今朝故山裏萬木風已微白雲忽孤起池
邊記昔行城郭無人至三秋相望深獨抱悠悠意出郭
懷所親復上橋南路大田美多稼嘉澤何愆度人皆望
秋實淒其已風露策杖陂中行低徊亦奚故

命童

今晨雨新歇日出東南隅草樹有佳色當軒散紛敷歡

言命童僕治我園中蔬幸此琴冊暇且復一荷鉏雖有
黽勉勞良足具中厨但恐惡草長不治成荒蕪世事每
如此豈敢忘勤劬

青霞洞天偕章三益僉事觀石橋

太末一為客倏忽三四齡常恐玄髮變未諳滄海情今
晨屬休暇文彥皆合併方舟濟沙步飛蓋指巖扃青霞
天之表赤日午正停息陰無擇木抱渴無藏冰寧知大
火維有此真福庭巨石跨千尺如梁架青冥深疑地肺

開洞見天光明玉樹交左右禽鳥無一聲涼風度澗水
炎濁蕩然清昔聞偶奕者坐穩交心兵相持執方急旁
睨耽若醒柯爛胡不歸海枯固其恒蠻觸遞翻覆大化
何由停不如飲美酒且置石間枰

張節婦

人生為夫婦結髮相因依恩愛在偕老零落中路歧夕
坐守空閨晨興簪惡笄身為張氏婦葬立將安歸願言
持寸心如石無改移上奉百歲姑下哺兩男兒兒雖膝

所出孰匪夫體遺蒸嘗苟有託門戶亦足持瞻望恐弗及劬勞庸敢辭鄉人敬婦德縣官尊母儀二子伯與仲孝思長不衰相見髮種種猶說襁褓時故家海東頭波濤誠渺瀾獨有雙柏舟可以濟艱危行者曾弗操令人怨蛾眉

桐谷山房

客從山中來為言山中居種樹不作琴清陰常繞廬翛然窗几間中有竹素書上窺聖人奧下抉百氏殊寥寥

千古意問子今何如勿學臧與谷亡羊苦多途願企心
齋人不遠復爾初歸撫庭前柯應見雙鳳雛

南箕長好風

南箕長好風東畢復好雨陰魄生自西終夕成乖阻悠悠
望彼蒼脈脈不得語起坐酌酒漿北斗在庭戶

冬日何可愛

冬日何可愛夏日何可畏矯首問羲和羲和不停轡寒
燠相代更天運自有常但惜愛日短不及畏日長

日出照高樹

日出照高樹翳翳綠當戶端居念友生淹泊何處所西
路阻且長東流莽回互豈云阻音容亦乃乏書素懷德
必有鄰興言自中古振衣起行行見此褐之父

示項生

去日不可追來日猶可期朝采六蓀英夕玩忘其疲海
當衆水積聖亦途人為挾冊自有得焉用比臯夔

其二

明招山中人高義無等倫恨子弗見之一去五百春我學如贊疣未成先誤身誤身不淑誤世心不仁

其三

大音在天地浩浩空山河作者推李杜千古未足多至哉風與雅采之委巷歌世人事凋琢伐柯徒伐柯

其四

嚴霜十二月雞鳴思遠道遠道方迢迢客行何草草竭從汴水來復鼓秦淮棹秦淮梅柳樹物色今年早

湘筠辭

湘之山兮西迤湘之水兮東驕何箇簷兮孔多望不極
兮湘之浦帝子去兮雲中俾夫人兮延佇曾莫樹兮椒
蘭又莫檻兮衡杜載雨兮載陰滔滔乎誰與度將以遺
子兮琅玕抱幽貞兮永固

風雷引

烈烈兮轟轟為颺兮為霆迅發兮震雷驚薄太虛兮下
上聲謂天憐兮孔仁孰司柄兮赫厥靈民無愕兮載寧

威既揚兮沛澤零

長清操

河之水清兮清且漣漪我泳其流兮而原之不知我飲而鹽兮我何求思劬兮劬兮毋揚其波兮毋渥其泥

思沂操 曾氏有居越者睠焉不忘魯之舊鄉

余以聖賢之道不下帶而存也作思沂操以

廣其志云

沂之水兮泱泱曷不歸兮以浣我裳我思兮孔長沂之

水兮湜湜曷不歸兮以沫我德我思兮心惻沂可思兮
亦可泝予鼓而舞兮喟吾之興兮

越水操

越水浟浟兮不可以方舟旋桓有魚兮不可以為鱠九
罿寸目兮豈不密且周惟鯀及鮪兮竭澤是求有獮有
獮兮復跂于洲

長山操

長山之下兮翳翳其木易于原田兮亦有嘉穀孰馮于

陵穿予之屋不以我為虞兮反縱爾毒匪兕匪虎兮曾
莫我敢逐

附宋璲詩

字仲珩文
憲公之子

寄張允載兼東項思復

憶昔到京畿與子寓官廨一見即相歡不翅舊交快維
時困道塗驅車久行邁忽逢弛擔初欣若身脫械握手
坐氍毹欵語慰疲憊情投比黏膠意愜甚搔疥項君數
過予滯下喜方瘥三人互談噓何殊合糾繢驂鑣出游

街古蹟探其怪路入青蓮宮駐足聽梵唱薄晚始旋邸
傾倒形忘瘵周詳論書譜從容說詩派凡習尚浮華遺
音日已壞作者固繁夥咸韶混夷靺瀾倒并波隨疇能
捄危敗顧余樗散材頻年處卑隘枘鑿乖方圓甘遭世
倒賣人將競嘲譏予乃敦教誠苦言加箴規默默使心
解酒酣示新篇辭源極滂湃却類任公子投竿下羣犧
應似蒼嘉禾蓐治絕梯稗讀之神駭驚秋蛩罷嘶喝政
圖籍薰陶別還隔遙界欲叩寢食安但復占爻卦浦汭

守衡茆無從豁矇曠譬諸鐵在爐伊誰鼓風鞴况乃患
沈疴軀命猶纖芥侵尋閱暑寒孱弱乏剛夬精神盡凋
耗面目多腫膾布衾暖閣眠藥裹晴簷曬年來獲告瘳
書齋仍掃灑猿鶴亦爭慶似索煙霞債綴賦詠雕蟲攻
篆學垂莊有時看飛泉四山寂無吳思取古遺經一覽
適炎暎蘭膏繼日晷矻矻警睂懈視已常歛然進業慚
質釐志須成絲枲未能脫菅蒯篤信宴安中懷毒劇蜂
蠭蚕暮自深省此語諒非讐近聞子亦歸親朋樂情話

千里感貽書殷勤馳一介而翁幸康強愧缺牀下拜

春夜詞

春閣凝溫翠雲繞五色流蘇垂娟娟美人自脫玉花鉢
子帳香棲綠衣烏銅鳧漏聲夜初墜紅暈搖晴燃蠟火
欲寄相思無鯉魚月色梨花然朶朶謾將軟帶結同心
開簾微步鞚韁陰芳眠未穩鴛鴦枕早樹重重啼翠禽

采桑曲

桑芽露春微似粟小姑把蠶試新浴素翎頻掃細于蟻

嫩葉纖纖初上指朝采桑暮采桑不得盈頃筐差
將辛苦向姑語妾命自知桑葉比家中蠶早未成眠大
姑已賣新絲錢岸上何人紫花馬却欲拋金桑樹下

劉璉字夢藻文成之子

遣懷

綠鳬水中遊白鶴雲間飛霄漢有修程焉能顧卑微浩
蕩展羽翰崑丘以為期鵬鷁趨下風羈羅絕張弛倏忽
萬里餘摧頽不知歸空林有故巢繁霜日霏霏孤雌哺

黃口啁哳將疇依
豈如戲蘋行雙棲
在漣漪

白楊河

白楊河下春水碧
白楊河邊多估客
東風二月柳條新
却念行人千里隔
岸上居人纔數家
茆茨深處見桃花
小婦河邊汲新水
老翁門外看雛鴉
桑苗青青麥苗綠
牛羊散落村墟牧
行客年年任往來
居人自住楊河曲



石倉歷代詩選卷三百三十二

欽定四庫全書

集部

石倉歷代詩選卷三百三十三至

詳校官庶吉士臣龍廷槐
侍讀臣孫球覆勘

總校官進士臣朱鈴

校對官編修臣盧燧

謄錄監生臣馮填

欽定四庫全書

石倉歷代詩選卷三百三十三

明 曹學佺 編

明詩初集五十三

鄭真

字千之
鄭縣人

平陵東 王莽篡漢翟義起義兵莽殺義其門
人歌以怨之

平陵東翟義死東海翻冤莫洗漢賊已成漢鼎已傾屈

膝北面誰為臣嗟哉忠勇甘殺身櫬槍光芒射天闕怒
髮上指雙劍折碧草萋萋一泓血漢家神靈杳空濛欲
排闥闔訴難聰吁嗟平陵東胡獨死義公

公無渡河

公無渡河公竟渡河吁嗟奈公何長風掀天濤浪急蛟
龍垂涎待人食公乎渡河甘墜溺慟哭河水渭公乎不
返將安之憶妾嫁公時窀穸天同歸如何中道乖百年
負深期河流湯湯猝未乾妾欲見公良獨難鳴呼命兮

公所安公所安吾誰怨愁來泣把箜篌彈高聲淒切淚
橫臆化身欲填精衛石河南宮闕弗聞公乎渡河嗟莫
及中心慘慘思愔愔請公來聽箜篌音相從願向重淵
深公乎公乎知妾心

搖搖花

虞美人草也

搖搖花開向天涯花搖搖花如金步嬌惜昔美人年
正少青春正觀花容貌金釵聘入霸王宮嫣然一笑胭
脂紅獨夫叱咤空四海恩窮惟憐一身在戲馬臺前宮

闕深當筵歌舞娛君心君心荒兮霸業消淮南却望烏
江遙漢兵十萬紛於蟻帳底美人淚如水八千軍散楚
歌聲倉忙忍為君王死陰陵古道行人來傾國傾城真
堪哀金劍霜飛一泓血天魂化作春花開花開花落流
年改春秋浩蕩愁如海愁如海將奈何虞姬墓前煙草
多花魂寂寞欲歸去杜宇夜啼三月暮

龍舟戲水曲

千里晴波汴河鑿萬丈虹橋依樓閣龍船錦繩駕風來

五色騰驤駭鯨鰐
河伯深宮執玉朝
鮫人震懾停織綃
三千粉黛出歌舞
星裙霞帔水飄飄
大業官家擁蠻輶
香熟沈檀藹煙霧
吹簫擊鼓向中流
倚空笑指江都路
瓊花三月春晝閒
高堂照鏡憐容顏
回首安歸歸不得
風濤洶湧愁人間
君不見舊日燕都跨
海子五爪盤擎綵雲
起天魔舞罷翠葉奔
高柳斜陽映秋水

烏夜啼

淮海天高銀漢低
古樹月明烏夜啼
山人謾說烏頭白

舊日秦庭遣燕客先生曷賦歸去來窮途戚戚胡為哉
是時先生睡初熟夢裏聞呼嗟苜蓿起來暗憶故園棲
著書每及烏啼時龍庭需材資黼黻姓名一旦登金闕
江廣作官天萬里襟懷湛湛江西江水明良盛世遇風雲
欲把丹心報天子讒言貝錦無停梭鳥聲吠月愁奈何
挈家輸作池河住吁嗟歲月成蹉跎玉律清商奏中夜
倥偬愁懷一輸寫却將心事問靈鳥蕭蕭白髮當何如
我聞烏啼有凶吉天意悠悠真可識細聽枝上聲啞啞

抱琴定向山中家。山中仙人紫霞服。步虛好聽鳥啼曲。
消得門前五柳青。風流祇似陶淵明。任爾烏聲竟昏曉。
物我兩忘天地老。

附桂彥良詩

雙峰

平車晨過杜湖嶺。喜見屹立之雙峰。千里松風奏韶濩。
一泓秋色潛蛟龍。仙禽古樹集梵刹。細草幽花迎竹節。
齋餘晏坐山閣靜。夜深隔屋聞疎鐘。

和陶詩二首

蛟龍作雲雨蜉蝣出以陰小大各有適胡然愁予襟架
插千卷書壁掛無絃琴希賢復希聖視古猶視今所貴
生世間動止為人欽有琴莫厭彈有酒莫厭斟窮居見
高節寡和乃希音誰能言囁嚅強顏隨冠簪子雲媚新
室立言徒艱深

又

神龍困淵蟄野鶴凌空飛飛潛不同調一喜復一悲我

生悟物理獨立恒無依飲酒得真趣讀書探指歸匪為
究窮達亦復知榮哀前賢有遺則行行慎無違

附烏斯道詩

字繼善

古詩七首

驅車涉太行中道車輪折挽舟溯河流中流纏縻絕前
涂鬱漫漫徬徨欲懷歸積雪被長坂洪濤蕩寒暉胡不
戒未然聞中慎所之徒懷百年志自貽千里悲借令無
顛躡豈念出門非且將詎徒御羸糧一何遲

二

女蘿依松柏松柏不可依巨榦遭翦伐修蔓殄無遺女
蘿當奈何無依乃其宜盤旋大化中春榮秋自萎升高
豈不好夭折亦足悲

三

荆棘開好花娟娟耀芳辰羅生及周道未嘗罹斧斤斧
斤或相加芒刺反傷人朔雪貸其死后土固其根人力
愧辱弱天地胡不仁崇崗有松柏日日摧為薪

四

中郎嘆知已江夏殺所依愛憎生逆順良窳繆是非不
憂漢室仆乃為董卓悲不憤奸雄術乃謳禡衡譏傷哉
英傑士終為識者嗤

五

飢不食虎肉寢不處虎皮虎皮非不暖虎肉非不肥本
受戾氣生邈與正氣違奈何五行秀乃與戾相隨胡不
觀鳳鳥猶能慎羽儀朝選竹實食暮擇梧桐棲

六

螂姐素甘帶鴟鴞喜食鼠蛇長即吞象謂小能制虎鷹
鷗與鴛鴦生同被毛羽胡不念同類搏擊苦相侮鴛鴦
好文彩疇能憐愛汝

七

猗蘭畏陽盛甘菊懼蟲食昌陽惡溪涸揭車傷土瘠上
有寄生草蒙茸託松柏下有無名花紛披弄佳色尋芳
邈無人空有馨香德

題寒林遠岫圖

遊子念遠道歲晏不得歸出門見林薄日暮煙火稀
闊山渺千里猿狖聲正悲况爾霜雪繁鳥道不可躋
陽春固伊邇奈此寒無衣衣寒何足歎所憂美人違

附顧慤詩

次黃參政漁樂韻

溪頭黃雲晚不雨柳陰無人棹歌起芙蓉數朵溪上山
蒲萄萬頃溪之水錦鱗玉尺揚文瀾暢飲誰識銀瓶乾

歸來白月滿蓬戶夜深夢落磻溪灣

騮馬歌

熒惑宮中一團火踢倒祝融掣金鎖飛來塵世化頑虬
滿背紅雲結花朶絳鬃拂膝朱尾長赤瑛絡胸紅絲纏
炎光閃閃照人熱渴死造父愁王良北平公子宛庭簿
萬鑑黃金求赤免黃羅抹首袴褶靴虎氣逼人如呂布
江南書生力不多一躍五丈飛官河相看馬上失聲笑
但見碧烟如鳥過電光拂眼騰朱梭駿快不數生蛟罷

研朱為寫紅叱撥喚起杜陵為我歌

贈張鍊師歸鳴臯

寶匣龍章御勑開仙師辭闕返蓬萊鳳池劍影隨雲化
鶴背松聲帶月回火候不須調藥竈仙名今已著丹臺
柏枝燒罷應多暇報我藍田長玉裁

題推篷圖

記得當年訪老逋扁舟載雪過西湖香浮水面涵清淺
影落蓬窗半有無玉樹忽驚春漏泄水花相照月模糊

誰將一段真消息收拾歸來作畫圖

附范宗暉詩

古意

茫茫宇宙間事物皆有理衆理具一心求之亦甚邇微
言寓羣經歷歷有根柢致知良匪易典學念終始
人心固危殆況乃衆欲攻外誘目膠固乃蔽明與聰熾
然不可遏至理或銷鎔制之豈無術淡泊以為宗
積羽可沈舟羣輕能折軸巧言必譎張利口多翻覆詖

淫及邪遁害事為甚速苟不塞其源涓流蔽川谷
稂莠終亂苗珉瑜頗相類君子與小人顏面亦不異善
惡本殊途薰蕕豈同器辨之如不早斯為名德累

次喜雨韻

惟公鎮南服蒞政誠有為務農重民食注意恒在斯方
春忽亢旱惻然為憫之致齋禱羣祀雨降不愆時原野
動生意枯槁回芳姿溝澗盡盈溢川谷合深陂天道孰
云遠一念從可祈老懷深有感因之播聲詩

謝賜衣

吳蠶作繭繅車鳴機中白苧新織成高臺捧出綺麗生
光彩奪目四座傾并刀裁就疊雪輕華裾曳地穩稱情
我歌白苧翻新聲移商換羽曲調清君不見夷門老侯
生七十抱闊無所營信陵當日倘未遇安得千古遺芳
名

鳴鳳歌

黔寧公子國之禎遠鎮南服為干城奇材異彙重題品

山川草木俱增榮近從滇池得紫榆錦紋玉質含霞頰
斲成琵琶極華麗寶之不異金與瓊鷗絃犀軫龍香撥
鴉青條綰猩紅纓方當下指曲未成一座已聞鸞鳳聲
初疑秦臺下簫管復似緹嶺隨匏笙又如崑崙斷嶰竹
雌雄應律相和鳴大絃鏗鎗若呈瑞喧呼雜還聲鍾鐘
又疑喬林噉竹實天風披拂飄琮琤小絃迸連如出穴
俄聞噦噦凌高冥忽若相呼飲醴泉餘音嫋嫋流春冰
大絃小絃或並作却疑啄碎瓊瑤英絲雲飄飄激遺響

百鳥不敢翔中庭開元玉環未足數坐令六詔聞韶英
請從席上賦長句願備樂府歌昇平

題春山勝覽圖

雄藩遠控西南陲地連六詔通諸夷山川形勝土肥沃
風氣頗與中國宜方當青陽播晴旭欣欣草木含華滋
溪毛雲骨動生意山光水色凝清暉花稍日月燦晴錦
柳條風暖綠輕絲鳥聲嚶嚶出幽谷物情和暢涵春熙
平疇水足夜來雨家聞播穀勤畠畬維時統戎稍閒暇

省民問俗無遐遺按轡徐行過村疃雲旌翠節光陸離
邊氓久矣望風采馬前羅拜語溫伊勞來慰撫殊未已
仁聲義澤淪膚肌比屋歡呼歌擊壤雍雍若在唐虞時
缅思先王拓茲土兵不血刃人心歸至今廟食重明德
代有陰隲安黠黎公令更欲敷政化非事逸豫耽遊嬉
我今作詩誦厥美太史觀風應採之

閒情

齋居無俗尚自愛適幽情風定樹陰合雨餘泉脈清枕

書雲伴臥步牒鶴隨行曾與鄰翁約朝來共析醒

述懷

步牒緣蘿逕翛然鶴睡驚竹深清露滴樹杪白雲生飛去誰家燕啼來何處鶯今朝新酒熟適足遂閒情

山莊小酌

別墅花初放叻陪繡節過客如梁苑盛地勝午橋多吟好詩先就杯深面易酡不因歸騎促洗盞更聽歌

齋居

齋居習靜晝初長。風暖閒庭薈葛香。
日影到窗飛野馬。雲根採藥斲松肪。
年光荏苒閒方覺。學術迂疎老易忘。
珍重使君多轉念。偏題書札到山房。

送素軒公迎總戎自交趾回

上將班師自海壘。將軍迎謁出南溟。
山河表裏歸中國。兄弟恩榮自九天。
凜凜星矛明曉日。蕭蕭鐵騎帶寒煙。
當年事業銘鐘鼎。復見勲名著簡編。

和僧中庭韻

平公卓錫滇海南出世有如優鉢曇庭前柏樹曾手種
堂下玉板容我叅談禪直解心即佛從師獨見青出藍
隨身一瓶與一鉢碧山為伴雲為菴

題山水

初日照雲林寒泉落風磴緬懷塵外蹤悠然動清興

石倉歷代詩選卷三百三十三

欽定四庫全書

石倉歷代詩選卷三百三十四

明 曹學佺 編

明詩初集五十四

陳敬宗

字光世
慈谿人

同東里楊學士郊遊分韻得臺字

熙陽麗神甸鮮飈蕩浮埃采真造琳宮抗蹟登銀臺桂
柱產朱草洞門閉蒼苔况與塵世隔浩歌望蓬萊勿逢

赤松子羽駕空中來笑扶綠玉杖遙勸紫霞杯寶訣為
我授瑤笈為我開舉手復遠別悵望徒徘徊

題回文卷

年命能幾何歡愛恒不足結髮情未衰新人美如玉侈
心移室家讒口傷骨肉秋風度蘭帷春光麗金屋鸞鳳
愛雙翔鴛鴦憐獨宿誓將托錦機懸慙組心曲緘之惠
遠方長途冀旋轂庭花為誰芳尊酒空自綠中饋幸見
收敢怨懼斥逐君心如明月應諒無遺燭

題吳興趙公畫馬

古來畫馬說韓幹，神駿今數吳興公。
天機巧妙奪真造，筆意所到精靈通。
曹君曾圖照夜白，少陵徒咏玉花驄。
可憐人馬久不見，忽復覩此天閑中。
毛為銀絲雪為質，逸氣稜稜橫八極。
騰空駿足雲影翻，夾鏡方瞳電光赤。
房精夜燭渥水渭，矯然育此真龍媒。
同誇絕代得駿骨，顧視萬馬皆凡才。
奚官牽來玉墀側，叱鬚碧眼朱袍窄。
絨鞅碧鞚珊瑚鞭，錦韁綠轡黃金勒。
吳興自是宗室親，次

腰裏驛鴻嘗見真飛騰驚竦合變化顧爾觀素皆麒麟
祇今披圖畫堂裏便覺長鳴朔風起安得真持獻紫宸
參駕龍輶奉丹宸

送楊進士歸南京

城闕鐘聲曙河山雁影秋琴樽千里別冠珮兩京遊遠
樹連平野涼風送去舟懷君明月夜矯首鳳池頭

元夕賜觀燈詩五首

皓月金門夜和風玉殿春雲移三島近燈簇萬花新天

仗臨丹宸星橋接紫宸中官宣德意宴賞及羣臣

紫禁疎鐘靜高城刻漏傳五雲迎寶蓋萬戶綴金蓮瓊醴行仙席龍盤進御筵教坊呈百戲齊過玉堦前

劍佩清宵近峰巒翠閣重花明金殿月香度玉樓風拜舞諸蕃集歡娛萬國同遙聞歌吹發五色度雲中

紫陌連清禁彤樓接絳河九門星彩動萬井月華多寶炬通宵晃鸞笙協氣和臣民涵聖澤齊唱太平歌

山擁金鷲壯雲盤綵鳳來星河隨斗轉珠闕倚天開歡

洽春聲徧恩添淑景回願歌魚藻詠長奉萬年杯

元夕賜觀燈詩三首

河漢沈沈霽景澄蓬萊燃滿九華燈青猊白象三千界
綺閣雕欄十二層花繡芙蓉濃艷吐簾垂翡翠異香凝
世人惟向雲中見遙望天門不可登

樂奏韶咸寶扇開遙瞻龍馭自天來九門杳逐靈飈度
萬國春隨御氣回彩鳳高臨青玉案彤雲輕護紫霞杯
臣民共願宸遊樂海內歡聲溢九垓

中使傳宣宴百官。珮聲遙集五雲端。酒傾綠蟻開金甕。
饌鱠蒼麟奉玉盤。寶帳春回頻送暖。瑤臺雪霽不生寒。
侍臣沾醉蒙恩德。更勅都人近御看。

題五馬浴川圖

翩翩天廄五龍媒。太液池中浴未回。身散玉花雲影動。
日流星彩鏡光開。負圖似向榮河出。孕質疑從渥水來。
明日彤墀齊立仗。總承恩澤下蓬萊。

夜坐即景

翠竹當窗月照池
焚香獨坐夜深時
興來更掃門前雪
閒看梅開第幾枝

白蓮

太液澄波濯素容
玉衣垂影水晶宮
月明無處尋顏色
只信香飄十里風

附金湜詩

字本清
鄞縣人

題唐明皇吹玉簫圖

昭陽殿高清晝長
珊瑚枕壓七寶牀
珍簟平鋪碧雲冷

珠簾半捲秋風涼此事諫疏非無補君王自喜教歌舞
舊曲翻成阿濫堆別調新傳玉簫譜玉簫一曲度薰風
宮商十指何玲瓏碧沼游魚窺菡萏丹霄彩鳳鳴梧桐
梨園子弟多白髮承宣獨喜王番綽手提玉版不停敲
足踏青蒲恣歡謔雙雙粉黛誰家女霓裳細拂鮫鯉縷
斂袖低眉不動塵似解嗚嗚曲中語從來聲色侈人心
人生樂極悲亦深豈料簫聲入雲去化作漁陽鼙鼓音
河間府瀛海驛寫竹遂成長句

我本東南瀛海客乘興來登瀛海堂堂中開簾分廣席
四壁拂拭如秋霜老夫見此發長嘯便覺清風滿穹昊
呼童捉筆破水墨胸中恍惚窺天造何須巧作鐵鈎鎖
何須苦效金錯刀大竿小挺恣揮灑千枝萬葉分秋毫
何須坐對湘江雨何須去踏淇園春清泉白石漱寒玉
琅玕翡翠排青雲雲氣淋漓墨猶濕隔窗似聽湘娥泣
免翻鶻落魄愁一夜轟雷破春蟄蟄龍振起風怒號
蒼煙翠霧翻波濤鯨鯢帶雨走平陸龜鼈跋浪聲噭噭

從來造化不可測呼吸陰陽在頃刻貧當谷口冥煙開
白日龍來作人立黃堂太守人中英懲懶置酒當前庭
大觥小觥迭相舉賓僚進退如諸生我亦平生好奇絕
為作長歌歌一闋樓頭羌管落天風筆底驚蛇走冰雪
歌罷出門呼驛吏叮嚀窗戶須常閉只恐天工有使來
一朝捲入空中去

文華殿入直

秘殿深沈鳳閣東中官催召寵恩隆露分仙掌薔薇綠

酒賜宮壺琥珀紅咫尺龍顏呈日表從容天語出淵衷
侍臣才調皆班馬獨愧抽毫賦未工

登多景樓

滾滾江流動地來重重樓閣任天開行當草罷平邊詔
乞取青山作釣臺

附鄭惟廣詩

字汝誠
鄞縣人

五更轉咏促織鳴東壁送友人

一更風露清東壁寒蛩鳴所懷離別人獨坐傷我情

二更人愈愁聲聲近牀頭昨日攜手好今夕在他州
三更月正圓促織爾何然欲夢見容顏展轉不得眠
四更更漏遲唧唧鳴聲悲含情不可聽復起坐孤幃
五更聲欲殘霜落空林寒其如遠人何相思路漫漫

行路難

君不見江上山峨峨絕頂人莫攀又不見門前水日夜
東流何時已鄰家少婦長嘆息青鸞日掩心相憶春來
花鳥每闋情夫婿年年為軍役

自君之去矣三首

自君之去矣日夜長相思思君如朝露湛湛能幾時
自君之去矣春草迷江路思君如流水一別經幾度
自君之去矣好鳥鳴芳樹思君如春花香色何時曙

靜夜思

中夜起徘徊天空月如洗為憶閨中人渺渺湘江水

南征詩

九重命下靖邊陲萬里秋風汗馬肥劍氣橫空銷瘴霧

日華絢綵動旌旗豺狼已遁深山跡虎旅方揚上國威
功紀太常應有日都人遙聽凱歌歸

附戴浩詩

字彥廣
鄞縣人

述懷

昨日傷風獨倚樓今朝倚檻又悲秋桃花乍吐蒸霞爛
楓葉隨飄逐水流明日清風惟我得落霞孤雁向誰收
佇看覆手須臾頃贏得虛名老白頭

咏春

九
十
春
光
似
酒
濃
隔
簾
香
暖
小
桃
紅
杖
藜
緩
步
尋
芳
草
閒
逐
黃
鸕
過
水
東

咏秋

西
風
滿
路
桂
花
香
吹
徹
天
街
似
水
涼
獨
坐
南
窗
讀
周
易
半
輪
明
月
照
空
梁

春曉聞鶯

東
風
微
度
栗
留
聲
羌
笛
輕
調
百
囀
清
喚
起
春
光
無
覓
處
柳
堤
花
塢
霧
冥
冥

題風烟雪月梅

忽覩殘花滿玉臺
恍如鱗甲印蒼苔
也知搖落難留處
幾度春來取次開

一抹輕烟撥不開
朦朧淡淡鎖妝臺
仙肌猶自無顏色
何日添容傅粉腮

六花飄落五花開
兩白交輝絕點埃
花神不怕寒侵骨
能占江南百卉魁

一輪明月照長安
萬斛珠璣鏡裏看
莫道我家無好處
只道長安是好處

一簾清氣滿闌干

石倉歷代詩選卷三百三十四

欽定四庫全書

石倉歷代詩選卷三百三十五

明 曹學佺 編

明詩初集五十五

張楷字式之
慈谿人

李陵詠

李陵入匈奴自恃將家子眼空沙漠羣氣弱天下士轉
戰驅懦兵貪功入深壘殺氣慘雲日笳鼓昏未已苦將

死敵爭坐使家聲靡堂堂飛將軍夫豈衛律比遠意欲
有為偷生以含恥對案不能食殊方忍居此霜寒塞雁
鳴雪凍白草死迢遙望妻孥滅沒誰與理

老將行

少侍武皇親幸時天閑赤驃尋常騎當圍一箭落雙隼
萬口噴噴稱男兒天山夜搗單于壘葱嶺朝傾頡利師
琵琶帳底金鑿落刁斗營前鍊疾藜穰苴豈解知合變
孫武何曾識偶奇當時只擬名不朽誓向藁街懸賊首

相如白璧還奉君晉鄙兵符奪懸肘謾說三徵出草萊
誰誇百步穿楊柳運籌不數張文成決計浪傳陳戶牖
長笑廉頗惟善飯也知樊噲徒誇酒蹉跎世事若浮雲
闖外傳喧寂不聞帳下爭趨新號令道傍誰識舊將軍
對客龍鍾羞講武逢人磬折學談文壁上蟠螭翳雙劍
門前鳥雀散三軍願得子方憐老馬還同魏尚敘前勛

白頭吟

君彈綠綺琴妾賦白頭吟君意都忘絃上語妾詞空寫

心中素昔日還同得水魚今朝忽若經霜樹妾顏比少
未成衰君心已改少年時棄置文鵠逐雞鶩舊事盡乖
新事宜妾意將君比明鏡一物何曾照雙影風中柳絮
未曾粘浪裏浮萍那得定君豈東流去不返缺月終期
有時滿

各東西

天涯別我東復西行行各自念前路惟有飛塵逐馬蹄
今宵兩下宿何處不識君安并汝苦去日漸遠路漸長

幾夜夢中或相語飛雲上山泥入地一人一身原自異
風吹雲影落泥中到底相親不相棄

吳宮怨

江空月冷天如水銅龍漏咽沈檀死宮中粉黛一千人
白眼相看嬌妬起自入朱幃并翠戶幾番曾得君王數
君心好惡自不常豈在區區歌與舞宮門倚天鈴索垂
凍霜吹老青桐枝玉鑾隱隱背牆去何人邀得君王歸
君前豈無容妾地舊劍猶存肯終棄

隴頭吟

玉門將軍秦隴客十載不歸頭半白夜聞隴水憶秦闕
曉土城頭聽羌笛笛聲嗚咽送邊愁隴水滔滔日夜流
壯士三千豪氣盡家人翹首望封侯年年虛建平邊策
依舊黃沙隴水頭

晚次樂鄉縣

故國一千里他鄉此獨征亂山依遠戍寒日下孤城燈
火瞻程遠川原入望平不堪回首處孤雁入雲鳴

遊少林寺

步入金沙地相邀坐竹林僧歸青嶂寂龍臥碧潭深石
澗流春乳松堂落午陰高懷殊未已臨別更沈吟

和賦得暮雨送李胄

微雨滄波路孤舟薄暮時雁迷歸浦早雲濕度江遲白
日青山暝芳洲碧草滋紛紛到華髮相看總成絲

贈張將軍

百戰功何在荒城夕照間角聲千騎盡弓影一燈閒見

月思臨塞因風想出山當年青海上猶記突圍還

送人游塞

別淚墮如絲含情折柳枝晚風花落處寒日馬嘶時記
里知前路占程定後期百年能幾日強半惜分離

洛陽道中

洛陽大道上日暮香風多下客駐巾馬上客停珮珂

魏宮詞

乍起金魚鑰閒登銅雀臺新懽猶未極落日苦相催

漢宮曲

日暮上簾鈎春風壓翠樓忽聞宣召急羅帕掩箜篌

江南曲

忽得三巴信郎歸未有期只言風浪險不是薄情兒

尋張逸人

綠溪五里十里隔水三家四家借問先生何處柴門流

水桃花

長信宮詞

久忘恩幸不成思每聽和鑾意亦疑翠輦自經長樂去
傷心無奈月明時

和酒泉太守席上醉後作

高臺秉燭看劍舞四坐歡聲雜鳴鼓酒闌羅袖動輕寒
門外蕭蕭杏花雨

宮中詞

宮中楊柳戲青娥不見歲華舞鳳過怪底東風不相忘
禹牆吹送落花多

竹枝詞

浮雲日日蜀山頭
石瀨年年蜀水流
家住瞿塘三峽下
慣經風浪不知愁

江南春

滿川啼鳥怨殘紅
水郭春園柳絮風
新雨一番江水濶
草痕將綠到吳中

古詞

羅帕凝香濕未乾
朱樓窗外雨生寒
燈花知是虛傳喜

落盡青媒誓不看

附周旋詩

字克敬慈谿人有半江集

有所思

悲風起高樹陰雲蔽朝陽伊人在天末地遠道路長駕
言欲相就車敝馬玄黃秋深氣愈厲孤雁正南翔爰附
尺素書以寄我衷腸飛高影漸沒蹙刺心內傷

贈姚惟東

峯峯梧桐樹敷陰南山麓大枝立青銅小枝橫綠玉朝

晞旭日光暮來鳳凰宿爰抱琴瑟材屢睨中郎目凋斷
絰朱絃清商宣妙曲音響發至和宇宙調玉燭

暮春山行

馬色林間路山花作陣飛東風如有意吹去點征衣

西莊晚望

野水漫鳧汀烟蕪接遠坰數峰青抹黛遙指不知名

早朝

玉漏九門通銀燈萬點紅鳴珂齊百辟飛蓋擁重瞳烽

燧三邊靜車書萬國同侍臣封事少退食每從容

西崦莊

十年離世路終日對青山竹似憐人俗雲應陪我閒有
緣專靜壑無藥駢哀顏獨向階前立秋聲起樹間

次李商隱無題韻

弓鞋窄窄步移難獨倚妝樓暮雨殘情緒逢春那得好
淚痕終日不曾乾試拈彩筆驚肌瘦小傍銀屏怯被寒
恍忽却疑愆素約篋中時簡舊書看

又

蟬鬢輕盈不耐風
水亭簾幙怕朝東
瑤箋錦字無人寄
碧海青山有路通
倦態謾同芳草弱
愁顏不分小桃紅
天涯蕩子經年去
蹤跡東西類轉蓬

寄金華太守萬季崇

別來仍是十年餘
舊業惟存案上書
落日青山當戶牖
秋風黃葉滿階除
已無朝士知名姓
只有林僧問起居
老我得閒身尚健
形神多為苦吟癯

附魏偶詩

字達卿鄆縣人有雲松集

猗蘭操

駕言遑遑云胡以宿彼蘭者何猗猗空谷維蘭之芬維蘭之德薄言爾採寧不爾穀行道遲遲我心傷悲庶無內疚天其靡夷

題幽人歸隱圖

若有人兮遐方被薜荔兮荷裳殫三芝兮五蕙蹇幽獨兮茆堂春日兮遲遲春風兮微微鳴鳥兮喈喈垂楊兮依依覽佳辰兮何求沛吾行兮蘭舟時不可兮苟得邈

予懷兮中洲雲冥冥兮欲雨掇芳菲兮歸處羌蹇修兮
未來聊紓遲兮容與

公無渡河

河水溺人人共知公何披髮苦渡之匍匐追留河水渭
追留不及心傷悲湯湯河水寒風吹奈何公死食蛟螭
箜篌聲絕招不來我獨在世徒爾為

烏夜啼

秋夜烏啞啞啼上牆東梧書障欹枕淚如雨痛憶慈親

在何所夜半烏啼啼不已啼不已哀怨多吁嗟烏啼奈爾何

闕山月三首

皎皎闕山月征人看作愁幾回曾破鏡何日大刀頭

其二

今夜妾斷腸中天月正明闕山遙注目不得見夫營

其三

借問天上月古今照闕山荷戈來此地白首幾人還

少年行

橐弓插羽氣如虹白馬翩翩過市中解射飛鷗向沙磧

姓名新報建章宮

烏棲曲

鮫綃翠被鴛鴦枕殘夜寒風逼孤寢夢見郎君醒莫尋
流蘇寶結虛同心

宮詞二首

春花寂寂夜如年明月當空惜未圓歌管昭陽承寵幸

玉顏曾侍象牀前

其二

著霜宮樹錦離離
強捲珠簾淚暗垂
欲寫愁懷秋葉上
風飄恐被外人知

瀟湘曲

湘江曲
湘江曲
十里青雲漾
寒綠鷓鴣
深夜啼一聲
月明思殺人如玉

竹枝詞四首

綠竹遶江江水流朝朝暮暮只如秋不知世有炎涼意
好鳥幽棲在上頭

其二

幾處行船幾處商瞿塘如馬險難當船行可避瞿塘險
最險人心不可防

其三

鷓鴣對對戀蒲茸郎去家門不記儂野李野桃零落盡
上灘莫遇石尤風

其四

好花到處引商船
月子三四缺又圓
郎逐水流常不返
儂如百丈為郎牽

賦得官亭分袂送別

朝送客送客官亭上
別酒愁半酣
勞歌慘三唱
榜人亭下報潮生
秋風分袂難為情
合襟何日敍
長別拂袖今朝成遠行
苦欲去無計
挽衣留客住
數聲斷雁倚闌干
烟水孤帆渺何處

禽言

提胡盧沽酒飲碧草如茵花似錦及時須作歡作歡不可甚人生那得長高枕

摘桑看火莫為蠶忙致蠶禍出門採葉焙籠焚一霎延燒家業墮摘桑看火

麥熟辛療人飢婆餅焦鳥吟為憶山西婆餅焦飢骨枕藉于途婆餅焦婆化山頭不歸婆餅焦聲聲怨著伊誰婆餅焦

脫却破袴脫却破袴繫身誰不惡加稅青黃不接時杼軸賣空誰織布

得過且得過食盡毛衣更寒餓朔雲乍斂日斜明竊得微暄聊自負得過且得過羞殺當時錦羽飛驕語曾將鸞鳳欺

泥滑滑春雨多途中人行為何家有急冒雨行汝莫恨

啼禽聲

蟲言

織織織夜長機杼須勤力舅姑非帛不成暖秋寒莫怪
蟲聲逼織織織

秋了秋了蒲柳西風可比前日好流光疾似梭罕有百
年老貪財害物終日愁子孫未必能相保秋了秋了為
樂須及早

百舌吟

晨星暎暎殘月低衆禽尚睡鴉未啼樹頭春鳥獨何事
饒舌能令聽者迷間關宛轉百般巧乍聽仍續聲不了

鸚鵡能言豈及繁鶴鶼有韻無如巧飛來屋角自在鳴
向人媚語殊多情楚國禍緣斬尚產秦王心與張儀傾
欲訴化工除此禽此禽得時讒變音譖懇不行主明哲
堯庭舜陛鸞鳳吟

山居即事

傍壑敞茆堂寥寥別興長石崖峰釀蜜雲碓水春糧烟
鳥窺人語潭花伺午香柴門客稀到巖徑薜蘿荒

春曉

朦朧曙色微百舌枝頭語釣簾看海棠一陣催花雨

秋日西莊

平林旭日樵徑獨對涼風釣臺鷗鳥烟飛水啄槿花暮
落朝開

子陵垂釣圖

羊裘那肯換簪纓一曲桐江老此生高節終扶炎漢祚
魚竿不是釣虛名

石倉歷代詩選卷三百三十五